

四庫全書

集部

欽定四庫全書

集部

梅山續藁卷一
三

詳校官庶吉士臣翁樹培

主事臣呂雲棟覆勘

總校官進士臣繆琪

校對官中書臣朱炘

謄錄監生臣孫祥鳳

欽定四庫全書

集部四

梅山續藁

別集類三 宋

提要

臣等謹案梅山續藁十八卷宋姜特立撰特立字邦傑麗水人靖康中以父綬殉難蔭補承信郎孝宗召為太子春坊累官浙東馬步軍副總管慶遠軍節度使事迹具宋史佞倖傳陳振孫書錄解題載梅山藁六卷續藁十

五卷列之詩集類中則兩集皆有詩無文此
本出休寧汪森家附以禠文及詩餘共為十
八卷不知何人所增輯森序稱其流傳絕少
故繕寫以傳則亦罕觀之本其正藁五卷歲
書家皆不著錄意其散佚已久矣特立在當
時恃光宗藩邸之舊頗攬權勢屢為廷臣所
糾其人殊不足道陳振孫稱其本亦士人塗
轍一異儼然暫御之態蓋惜之也然論其詩

格則意境特為超曠往往自然流露不事雕琢同時韓元吉陸游皆愛之亦有由矣其上梁文引自述其生平最悉有云百首之清詩夜上九重之丹詔晨頒今考此集所載皆官春坊以後之作而所云百首者集中不載或尚有佚篇非其全帙歟乾隆四十三年九月恭校上

總纂官臣紀昀臣陸錫熊臣孫士毅

總校官臣陸費墀

梅山續藁原序

余讀宋諸家詩而自始迄終各有其原本焉五季以還家少陵而戶元白然分途攬轡超詣各殊即如梅宛陵之精琢歐陽廬陵之雅鍊蘇眉山之開拓變化黃涪翁之出沒浩瀚范石湖之丰標陸劍南之逸足真可謂百不為多一不為少其或以偏師制勝獨壘爭奇樹幟生前標名身後雖辟支小果游戲神通亦未可以優此而劣彼也夫山水在宇宙間莫崇於五岳莫大于四瀆然

匡廬奇秀雁宕奧區以至一邱一壑足以攬羈人之勝
致發幽士之高懷未始不登之載籍垂之今古何獨于
詩而疑之也哉麗水姜邦傑特立以恩廕補官淳熙中
甚蒙知遇觀其自題續藁深有味乎其言少陵詩云文
章千古事得失寸心知益可信矣詩凡十七卷外雜文
六篇長短句二十首流傳絕少故繕寫以儕於有宋諸
家不欲使作者之意隨世而湮淪也特立父忠翊郎綬
靖康時金人犯闕應募往南京調兵赴援刳股藏蠟書

縋城南壁為邏騎所得罵賊死之亦奇士也

康熙丁卯仲春之下浣休陽汪森書于裴杼樓

欽定四庫全書

原序

欽定四庫全書

梅山續藁卷一

宋 姜特立 撰

特立既備數官屬入則番直出則應酬無復灞橋
風雪間思也時時作應用小詩雖有慚大雅譬如
鷄肋不忍棄也故錄之名曰續藁

甲辰春蒙恩召試時年六十

霜滿頤間雪滿簪已甘蕭散卧山林如何六十公孫子
尚作當年舉子心

君王初未識相如誰與慙勤薦子虛莫笑麗官便無用
麗官也解試中書

恭和御製玉津園詩

輦路雲開雨脚疎君王游樂萬幾餘滄波不盡烟中景
清唱忽來江上漁此日丹青須立本何人詞賦似相如
小臣賡載無他語但詠山河壯帝居

松石歌壽皇太子殿下

萬生總總各殊稟中間變化通希夷大椿一萬八千歲

蟠桃結實千年期雖云閱世最久遠要自與物同推移

不如長松老為石仙家舊事尤瓌奇嘗聞道士馬自然
曾見天寶觀前屈鐵枝指云此木三千年去後合變堅

凝姿當時山上五里松龍拏虎蹲相與蛻化無餘遺六

丁夜半奉玉敕雷公礮碑

上先念切
下徒念切

轟取之陽侯

海神河

伯亦好事洪濤巨浪移荒陂至今空山斷壑所遺者一

塊未許千金窺壺山柏木不足道

壺山有柏半化為
石餘猶是堅木康

干節理由人為

四統康于河有松人斫之投水
中三年化為石節理皆松也

何如此

石最耐久萬年千載無成虧上不為女媧補天闕下不
為顓臾堵地維直將送似廣成子日與西母對坐同盤
嬉蓬萊海水會清淺廣成之壽無窮時

仰和令製臘中三白

六花紛委地隨物賦圓方未戒土牛候先呈玉馬祥月
孤難耀彩句妙與爭光不獨誇三白深宜熟五梁

木犀

木芙蓉葉未經霜籬畔黃花尚歛房正冷落中才吐艷

不思量處猛聞香釀成雲壑澄清氣滌盡炎鄉熱惱腸
便欲架巢枝上宿學他徐老愛花狂

西湖素公愛余泊舟小詩畫為扇子

老子詩中那有畫阿師畫裏自無詩我非今世王摩詰
子豈前身李伯時烟月正臨青嶂落灘聲惟許白鷗知
可憐半幅鵝溪絹寫此寒江一段奇

早朝

迷曉逆風飄漏遠驚秋墮葉響廊深五更又上籃輿去

金史卷一百一十五
卷一
忘却當年調笑吟

余少嘗為豔詞以
述歌酒間散之樂

寄華亭黃用之

陸機不聽華亭鶴張翰還思吳郡鱸何似故人無一事
菊花時節獨携壺

謝人惠詩二首

鑪鉞鍛鍊不遺力造化窮搜無遁情每對時人思杜老
不知能事屬先生

九攻莫下墨子守一矢難摧飛衛鋒始悟從前最高著

向來未肯付渠儂

偶題

莫恨盧姬嫁得遲尚能料理舊容儀
班姑陳后承恩早
衰悴難堪似少時

歲暮直舍感懷

歲暮坐公館永懷時序遷雪消殘臘外
春到蚤梅邊
夜色侵烏鵲年光送管絃
無人同晤語輸寫賴詩篇

道堂以梅結屏

歲寒三友要君知不比凡花兒女姿頗愛槎枒却高古
正嫌糾結玷幽竒豪夸何用錦為障瀟灑須添露作帷
可是道人多事在橫斜請看昔賢詩

偶題

花事匆匆一餉空清和池館轉薰風綠陰似欲專清夏
不許林間見落紅

借書戲作

無書閱市交何少有書覓羊趣何卑爭似北鄰兩公子

不嫌俗士笑渠癡

借庵

吾師自有庵何必從人借
聞道架虛空大千同一舍
天地即吾廬胡為號借居
趙州無住着不用更還渠

覓龍涎巧石

何年雲斧斫烟巒散在先生燕
坐間袖裏吾將有東海
憑詩乞與小巔岼

甲蟲淺俗棗仍昏沉水龍涎氣最芬
敢望凝香如燕寢

竹爐聊欲試氤氲

和徐判院見惠詩篇

姚魏誰教混草萊今朝老眼為君開建安自有親衣鉢
知道詩翁不姓梅

細知詩律折秋毫况是天然筆力高便好鋪張清廟頌
不須追逐楚人騷

新詩贈我繞朝鞭敵手相逢一憮然迦葉見花吾未解
靈均此秘子能傳

弔往文高古戰場麗天星斗射寒芒也知深奪曹劉氣
不用濃熏班馬香

閏七夕

此夕從來天上少斜河休問夜何其不須更恨歡娛短

已是人間十日期

人間五日當
天上一日

同官直舍有水犀一株盛開與余脩竹惟隔屏
牆爾暇日因共言清香綠陰不妨相過異時亦
是一段佳話遂成小詩

小山叢桂隔牆陰曲檻脩篁別作林芳意不孤符有德
寒梢相近本無心春多得地生何幸歲晚為鄰分益深
賴有高人發佳致因成盛事寄微吟

送陳寺丞得請補外歸鄉

京華正是熱官地公獨胡為起歸意家傳相業百未施
請佩左符聊一試相君道德人中英達識早保懸車榮
君王屢詔不肖起祇今父子俱芳馨小春十月壺山尾
橘柚垂黃風日美青衫昔出紫袍歸拜壽雙親親色喜

楊誠齋作日屋名小暘谷次其韻

旋規暘谷敵霜天
掩映金烏上紫烟
困睡不愁揮甕肘
坐吟無復聳詩肩

和張時可

一榻蕭然文字林
閉門十日卧春陰
園林寒重鶯聲寂
風雨時長草色深
坐念治聲違社酒
遙知搜句攪春心
莫愁鴈鶩分行進
簿領難埋曠士襟

黃用之遷居奉寄

聞道秋來過別居秋風應已入琴書草玄正要一區宅

入蜀何須駟馬車

時以事勿
勿去國

盡傾清俸買新居橐內無金只有書不用鄰人借輿馬
已知家具少於車

賦汪先輩昆仲聽雨軒

堂堂兩蘓公秀峙自西蜀一朝入京師聲價喧寥廓聯
翩取撫仕鳴鳳在阿閣方干赤霄上忽向青雲落黑風
吹紫荆天涯兩飄泊始感韋郎詩對床尋舊約篇章屢

致意念此友于樂生死竟垂違歸來已非昨汪君胡為此一官未渠縛兄弟自師友閉門方苦學便作聽雨謀無乃計已錯早榮或有悔晚達亦不惡問學須淵源文字要追琢歲久道自富時來功不薄但學蘓公賢嘲誚且莫莫

講官沈大監獻東宮米字回賜筆墨因作小詩
以求墨

聞道寶書天上去

元章有寶晉齋帖

却携香墨袖中歸

東宮故事皇太

子初拜賜
香墨四餅
安西紙背曾題識
黥餅文房要發揮
素篋想

藏元玉炯晴窗
應試翠雲霏
先生不作曹瞞客
分我東

齋發易機

題共閒亭五首

取介甫溪鳥山花共我閒語

幾年玉殿領仙班
霜滿烏靴塵滿冠
寄語山花與溪鳥
今回莫作故吾看

太行日暮車盤處
灩澦波翻舟下時
惟有亭中無一事
坐看忙殺利名兒

楊葉屢穿非是妙
庖刀未缺更須藏
何人識得閒三昧
袖手急流滋味長

花光摇曳猶多事
鳥語鞦韆徒自喧
誰是如今愛閒者
請來此地說風幡

競前正作螳旋磨
逐物方知鵲失真
安得此身隨杖屨
却來堂上作閒人

訪約齋三絕

滿城車馬隘如雲
百萬人家暗市塵
忽到南湖湖上看

始知物外有高人

雲鏡亭前水滿陂
渚渥堤上翠成帷
煩君為我買零簪
去作南湖踏浪兒

城中不異在郊垞
百畝園池夏木清
若為借我三間屋
相伴哦詩過一生

和張倅湖上十絕

曾訪高人舊隱居
詩情平澹宦情疎
緹屏今日雖泥軼
芸閣它時合校書

曠士同游興自濃
那堪霽景上瞳矓
忽驚畫手開千嶂
不見愁眉蹙兩峯

湖邊柳色媚清漣
湖上新荷疊綺錢
料得高人初出郭
眼中風物一醒然

仙山那許世人來
有底今朝洞戶開
青鳥想傳佳客至
不須驚汝問莓苔

是日游
真珠園

休日吟邊引興長
豈容簿領更相妨
怪君詩思如河決
曾夢西江水滌腸

寶叔祠前落照紅
平湖萬頃碧涵空
箇中有景君能道
添入三賢詩句中

群彥俱堪議相
氎小詩聊爾出穠纖
梅山老子何多幸
收得連珠歸玉奩

盡將邱壑捲胸中
醉帽歸時御晚風
明日府公催吏牘
可堪騎馬踏香紅

兩山勝處古墳多
多少英賢發詠歌
它日浮家釣清瀨
腰章吾欲換漁蓑

夕寒山水閣清暉歸到華堂月半扉
傾倒錦囊無勝語
風光那得更相違

直舍作小砌

直廬迫高墉隙土止尋丈
朽人累殘甃園叟昇新壤
方成一簣積已覺寸心爽
餘芳分禁掖疎翠眇林莽
雖無崑閬趣便有濠濮想
繞吟消永日靜對延孤賞
聊成兒女劇終契山林往
為語平泉公經營毋太廣

續麗人行

即坡公賦周肪
畫欠仲內人

畫師不作春風面豈是玉容容易見動人正在阿堵中
妙處猶須著歌扇沉香亭邊初睡起鬢髮瓏鬆薄梳理
欠伸背面故作妍半靨牆頭出桃李畫成衆目爭回顧
只欠孫娘折腰步似見不見愁殺人始是人生腸斷處
愁腸易斷可奈何古往今來此恨多君不見李夫人不
肯回身看漢君又不見楊太真擁行莫戀屬車塵自古
蛾眉多蠹國玉顏畫就還傷神

中秋寓直東宮是夕當月蝕雲興不見

中秋令節每多陰況復清居鶴禁深幸免蝦蟆矜毒吻
不妨蟋蟀伴孤吟連旬病腹難容酒獨夜清眠不愧衾
二八孤光應未闕小樓猶得共登臨

謝楊誠齋惠長句

平生久矣服時名況復親聞玉唾聲便擬近師黃太史
不須遠慕白先生巨編固已汗牛積長句尤能倚馬成
今日詩壇誰是主誠齋詩律正施行

和答劉慶遠

夙昔何嘗卑小官已將富貴等閒看科名不上韓公榜
事業難登漢將壇念舊詎能忘里社避喧終欲掛朝冠
故人不為吟招隱更極吹噓借羽翰

人惠醪

少年着意玩時芳每愛風枝玉雪揚老去此心渾忘却
不堪猶作故時香

使北二首

萬里持哀使北荒偶能成禮報君王中原舊事成新恨

添得歸來兩鬢霜

略無險阻蔽皇居底事當時醉寐如若使賈生參國論
便應咽死更無書

又

持哀萬里敢辭難汴泗都歸指顧間車上去程依北斗
馬頭歸夢到南山頗驚魏國山河少尚覺周家境土慳
聖主若圖恢復計直須神武取榆關

五代史中原之險
正在榆關自石晉

失之故中國
無險可守

渡淮喜而有作

船過淮南岸心如已到家何常異風景正爾辨戎華病
體辭深轍征衣脫舊沙江南即仙國何必上星槎

賦張舍人抱嘯堂五首

長身踽踽萬夫雄抵掌燕然立駿功韜畧故家傳圯上
行藏高志似隆中

自古英雄困里閭風雲相遇藉吹噓何人得似徐元直
說與君王蚤顧廬

不擁吳姝與趙姬不箋爾雅作書癡只今抱膝緣何事
北望中原有所思

餘子紛紛見每卑鸞凰鷄鶩謾相隨當時一笑無人解
此意寧容俗士知

毛生脫穎請行日祖逖聞鷄起舞時何似草廬長嘯罷
從容起立漢家基

禁中聞杜鵑

飛叫入仙城千門夜未扃那知清禁裏却有野人聽

苦熱二首

天地無情處
青林不動時
扇車熱
爐鞴竹簟煖
琉璃蟬
喘烟生
樹蚊餐
汗浹肌
不知秋
後鬢
留得幾莖絲

寸炬已如灼
積冰殊未涼
禦寒終有具
治熱更無方
坐溜午時汗
狂尋子夜漿
如何得鄒律
吹下九秋霜

梅山續藁卷一

欽定四庫全書

梅山續藁卷二

宋 姜特立 撰

潘德久永嘉佳士也聞其能詩久矣而不我過
僕一日以小詩挑之遂携古風見訪次韻奉答
聞名渴見面未合長相思紛紛數來人誰契此心期
識公恨不早委刺方嫌遲正欲我輩人共此一段奇良賈
雖深藏有寶人得知被褐既懷玉脫囊可無錐聊將一
縷麻換此五色絲曲意相假借仁衷恕嘲嗤子懷諒已

伸我慚亦自貽此道久凋喪相從當在茲

陸嚴州惠劍南集

不躡江西籬下跡遠追李杜與翱翔流傳何止三千首
開闔無疑萬丈光句到桐江賸深穩氣含玉壘舊飄揚
未須料理林間計蚤晚明堂要雅章

送宇文尚書歸蜀之官遂寧

吾聞峨眉秀絕幾千古下有人才紛可數長公少公兩
玉人一以為龍一為虎先生晚出躡其後萬里東來謁

明主青衫羸馬百官底一紀重經啟封土要將馮翊試
長材故向蓬溪開督府當時三鱣張講肆今日雙麾超
郡所白頭老父來挽舟朱組門生爭負弩莫辭迢遞溯
夔峽便見奔騰下牛渚西川東國一陶鈞盡灑沙堤丞
相雨

送米與人

乞米未傷廉送米豈為辱且炊子美飯試恩伯夷腹雖
無乳烝豚便可蔬當肉料得賢孟光舉案懽自足

和劉建昌除夕有欠我飲屠蘓之句

閒愁客底費驅除可復先生得自娛商陸火添人獨坐

沉檀香冷歲還徂

商陸沉檀皆歲除事

望家年甲那堪數

歐陽詹詩望家

思獻壽筭甲又增年

祭酒詩神合少蘓

賈島嘗于歲除取一年所作詩祭以酒曰勞吾精神

補之以是

來歲黃堂當此夕不知能解寄詩無

扈駕青城呈劉建昌

閭闔門開紫禁通金柅千炬蠟花紅胡為白水漁竿客
也在黃幡豹尾中三徑只今荒未了一尊何日屬相同

寒儒不恨遭逢晚猶勝書窻老蠹蟲

和劉建昌都下立春

岵嵒天闕五雲飛日上觚稜曉影移合殿侍臣頌綵樹

唐立春日侍臣賜綵樹

誰家纖手送青絲寒禁粉葉香猶淺煖入

陳根綠尚遲從此江山春意動使君拚費幾多詩

賦桐廬陳守瑞粟圖

仲尼不瑞麟周公旅命禾兩聖本一道胡為有殊差麟
固首四靈可賀亦可嗟或云一角獸莫能辨真訛鶚雀

奏天子朱鴈興樂歌文士頌連理野夫獻嘉瓜羽毛草木異皆物之精華於事竟無補徒然務矜誇食乃民之天有一皆可嘉君不見豐年樂歲人鼓腹凶年死人如亂麻以此較得失周孔道不頗桐廬陳使君理道蠲煩苛蠱敝既振飭刑罰從寬科民生樂其業自足致時和有農獻嘉粟累累來山阿數穗至八九紛然一何多圖狀競傳玩誌牒爭編摩使君政將成為祥理則那促歸不待滿合上金鑾坡嘉禾闕補亡精筆非君何

早朝

歌眠側耳數寒更欲起未起心不平何似山間渾睡足
卧看紅日上窻明

蛺蝶二首

水上蜻蜓木上蟬醯鷄飛舞甕中天如何爾獨多情思
結得千花百卉緣

園林五月綠漫漫雨後輕狂尚作團夏老不知花事退
猶疑春色在欄干

原贈

陸游

故人玉骨已生苔

謂南澗公

晚與君游亦樂哉湖寺繫舟無

夢去京塵馳騎有詩來醉中不敢教兒誦看處常須盥
手開彈壓風光須健筆相期力幹萬鈞回

和

遙知三徑長荒苔解組東歸亦快哉津岸紛紛群吏去
船頭衮衮好山來平時佳客應相過勝日清尊想屢開
若許詩篇數還往直須共挽古風回

得句

得句勝於得好官平生事業蠹魚間近來世味尤如蠟
唯有吟詩不奈閒

偶成

鹽面知新瘦看書覺近昏風霜不相貸老意與誰論

聖駕幸東宮

仙仗天臨下五雲承華氣象一時新薰風澹蕩飄黃繖
瑞腦紛紜點翠裯綵服戲時天一笑寶卮捧處日重輪

從今家國同休慶且壽雙親一萬春

海棠

絢麗繁霞綵熒煌瑞錦堆夜深疑睡去日暖怕慵來

柳絮

隨風弄日碎春雲撲戶穿帷惱殺人底事飄揚少拘束
愛將豪縱去酬春

丁未九日青宮侍飲

重陽開燕侍清躬次第攜壺到菊叢仙手撚花親泛酒

此時榮遇少人同

次韻木犀

老火西馳燒鄧林此花孤絕更清深
犀紋隱隱通肌骨羽葆層層間彩金
殘蘂尚堪然古鼎生香長得汎秋砧
形容盡入詩人筆不為唐賢歎陸沉

石盆水窠

數葉玉簪敷翠一拳水石含秋何須坐我濠濮自覺心
清境幽

賦海檜

孤根從何來遠自滄海植轉移失生意判剔費人力
拳蛇蚓結沮喪丈夫直餘妍撐孤翠枯理上微液僅供
盆盎玩竟闕參天色安得拉風雷一夜拔千尺

偶成

僻習難施日用間老人拘事更相關愁來得句翻成樂
忙裏尋詩却是閒

聞常伯韓公下世感賦

逸軌高標不可扳風流人物晉唐還胸襟磊落塵埃外
尊酒淋漓筆硯間英氣一朝歸碧落高文千古映青山
總惟莫莫知音泪極目樓邊有愧顏

又

六義湮淪吾道東敢將見處與人同後生不過東坡老
前輩今無南澗翁四偈真能垂具眼瓣香端欲嗣宗風
遺編一見如生面悵望新阡恨不窮

出使過嘉禾城外

江南清絕處此地數經過疎柳依秋浦歸船亂晚波王
侯幾蟻穴天地一漁簑安得玄真子同編唱和歌

送徐撫幹二首

便便滿腹貯詩書狗監何人薦子虛半世一官供偃蹇
羣公極力藉吹噓莫辭去佐芙蓉幕猶勝閒乘轂鯨車
文雅風流府中望它時合在玉堂居

莫嗟骨相未封侯媿惡窮通本不侔文似陳琳須草檄
賦如王粲好登樓時平上幕宜多暇酒賤清歡亦易謀

荔子丹時簪未利可能無句寄中州

人送雙鴈

卑栖籠檻尚成雙莫嘆凋零未著行猶勝孤飛千萬里
洞庭波上冷吳霜

次韻秋日五首

四山秋色冷銀牀燕坐高齋興味長何物與公堪比德
寒花晚節最馨香

冉冉寒雲滃曉扉涓涓墜露滴秋衣興來倚杖看蒼石

無限空山木葉飛

振衣雲岫一襟風
送目霜天萬里鴻
好賦遠遊揮八極
知公胸次小區中

木落山寒境更幽
世間萬事入搔頭
何人為廣秋聲賦
我欲歸田蚤晚休

不須樂府說無愁
不用尊前著杜秋
已把官情同嚼蠟
更將世事等藏鉤

次人韻思弟

二陸雙飛共一班
士龍何事別長安
故園花鳥應無恙
勝日樽罍且自寬
春草夢回詩思好
暮荆風急客衣寒
苕溪一水蒼茫外
無限相思入倚欄

喜陸少監入京

昔人思李杜
長恨不相隨
遙寄有劉白
同吟惟陸皮
物睽終必合
句妙却難追
試問長安陌
何如灞岸時

范大參入覲頗愛鄙作以詩謝之

問句石湖老
如將月指標
枯中說滋潤
高處戒虛憍
頗

許唐音近寧論漢道遙正聲今在耳萬樂聽簫韶

特立夜直讀荆公客至當飲酒篇感而有賦

客至當飲酒客去合如何人生無根蒂何必客經過有
客固當飲無客飲自歌有客與無客頽然同一科昔人
秉燭游正爾畏蹉跎粵余生多艱一官劇奔波讀書四
十年鐵硯空研磨糲食豈有肉菜羹或無嗟一衣遞單
夾摺製屢舛訛六十始小遇鬢毛已雙皤屈指從心年
光陰苦無多酒雖非所嗜不飲意不佳一醺助朝氣三

杯養天和放浪風月夕留連四時花以此畢吾生無愧
亦無嗟尋思百歲後有酒如傾河一滴不入唇誰見此
顏酡作詩廣前賢聞者且勿呵

戊申除夕

禁宿遇除夕孤懷還自憐浮生俱畏老造物暗凋年性
斧何勞伐心灰自不然好將閒日月送老白鷗邊

友人招飲適雲氣大作雨意甚涼

永日南薰入舜琴故人邀我共披襟歌姬可是能留客

故過行雲作午陰

出西湖至天竺

寶叔山前翠打圍
湧金門外水漣漪
出關便有漁謳起
底事公卿都不知

跳珠軒

激溜跳珠盡日間
却疑造物不曾閒
何如收取連雲笥
水自水流山自山

戲張時可

南湖堂上著彭宣
結得襄王夢裏緣
試問傍人鷗與鷺
何如隨步小嬋娟

奉送出關二首

陸游

君似襄陽孟浩然
寒驢風帽一癯仙
清秋客路知無恨
滿箸鱸魚不直錢

十年好句滿人間
不欠詩名只欠閒
剩欲賀君君領否
新街兩字是梅山

和

得失乘除誰使然茲行猶作赤城仙
支風給雨元無禁
借竹判花不費錢

黃塵烏帽六年間心跡何嘗一日閒
今日船頭忽東轉
始知有味是家山

出關

官路崎嶇閱歲華更無佳思發詩葩
出關便有山林興
續縈從今漸有涯

賦赤松金宣義十月牡丹

牡丹十月發春叢半倚微陽半怯風
渾似若耶溪上女
嬌愁初入館娃宮

赤松元是神仙窟公獨能開韓令花
若使雒陽耆舊見
定應擁褐過君家

過釣臺

兩山夾青蒼月照江茫茫一杯酌老婦
孤興發滄浪賢
哉羊裘公不肖仕漢光冥鴻已高翔
弋者應相忘

乍還里舍

十載彈冠始一歸
暗驚草露濕征衣
自憐猶勝遼東鶴
故舊相逢未盡非

和陸郎中

午庭風雨撼高槐
一洗城頭十丈埃
老子坐間尋句去
故人門外寄詩來
勁鋒久服穿楊妙
鈍思深慚擊鉢催
請佩左符君未可
要聽吟思發春雷

再和

合居瑣闥蔭庭槐
底事康衢走俗埃
莫買漁舟便歸去

好提鴻筆記方來湖山剩有詩神助事業寧須官鬼催
地理家有知道經綸未施用出屯行矣掃雲雷
催官之說

邸報改元得雪

天意陰晴凍未分忽驚璧璐散紛紜梅花露白難誇客
麥本藏青預策勲野水斷流魚入溙江雲垂地鴈迷羣
太平天子新鴻號感召端由叶氣薰

八詠樓

舊八詠樓因子城為基其地隘甚初無樓觀

之實隱侯在郡當齊建武甲戌距今淳熙已
酉蓋六百九十五年矣參政李公始築其趾
而增新之於是華榱傑棟憑虛望遠縹緲烟
雲間矣

隱侯故事許誰傳
領略江山付謫仙
虹抱子城增面勢
輦飛傑棟跨風烟
舊題壓倒三千首
壯觀追還七百年
我老登臨無好語
倚欄終日愧前賢

送邦達邦操弟同恪赴省

二陸平時譽望長近來小阮亦文章共排雲路升天府
穩坐仙舟入帝鄉去日漸驚梅萼破歸時同帶桂枝香
老夫已辦酒千斛細斫菖蒲作賀觴

二月道傍梅花

臘底春前探物華一枝初發競相誇如今千樹離披後
却愛遲開三兩花

梅山續藁卷二

欽定四庫全書

梅山續藁卷三

宋 姜特立 撰

恭和令製感秋

金虎肅秋氣屬茲搖落時
淅瀝暮蟬澁嘹唳征鴻悲
遙巘雲冒絮平林露成帷
黃凋菡萏盤紅墜芙蓉枝
濕葉填斷塹寒藤蔓荒籬
東儲感物變西陸占星移
清風已預戒秋陽豈難知
偶爾嘆僚慄卓然吐新奇
想象酒方酣浩蕩思無涯
不學楚人賦載賡幽土詩

雨霽立門外見萬山葱翠如染頗自喜得獨占
山居之勝因得亂道一聯遂足成篇兼懷曲湖

居士

吾廬何處是野色滿方壺一水長來繞千峰不用呼偶
然成擇勝幸爾憫歸愚問訊曲湖老何時訪老夫

自和

喜報紆芳軫深期辦酒壺興來更唱和耳熱自歌呼正
可談風月何須較智愚吾今方息駕無復問征夫

重午和鞏教授韻

屈子沈淵日年年舊俗忙佳人誇綵縷稚子競新裳
饒鼓喧漁步杯盤列象床山翁獨無事燕坐只焚香

醉後苦熱狂吟

休說唐裝與晉裝一絲不掛謾風狂登枝解袖不快意
脫帽露頂猶尋常我生憚暑老益甚束縛冠屨如以桎
梏置我旁安得天風吹上雪山頂憑陵大叫呼彼蒼下
臣塵世熱欲死願借三冬塞空之白雪十月隕物之繁

霜陰崖已凍裂復裂草木禽獸顛且僵此時天上天下
無暑氣姜子夜半獨立方清涼

閒詠二首

手植山松二十年只今翠色已藏烟百年未盡終當見
霧鬣風髯上拂天

翠麓青秧帶小川無營門巷自蕭然中間至樂何人解
只在藤牀拄杖前

寄鞏丈哭孫

情愛難纏曠士襟俗緣那似道緣深已知達識空諸幻
萬事從頭付醉吟

雙桃寄輩經略三首

只說瓜蓮並蒂生幾曾仙實見雙成却疑西母猶多事
戲作人間兒女情

世間固有無情物天上寧無有慾仙想得武陵人去後
精神交感此因緣

忽見雙桃入眼新捧看驚動坐間賓老夫得此渾無為

持壽高堂兩玉人

題陳朝榦山亭二首

高蹈烟霞遠世塵
翠微深處一綸巾
若非巖瀨垂竿客
即是桃源避世人

右翠微

豐草茂林皆綠野
不論芻豢與貂蟬
但能真得箇中趣
何必功名如昔賢

右綠野

次楊丈喜雨

銀竹森森度翠林，情龍不用血蹄泐。
倉箱且為農夫慶，敢說祠官俸有金。

謁瑩

新晴衝曉謁先瑩，頗愛山行竹樹清。
日午未須回俗駕，且留趺坐聽松聲。

呈楊方叔

老醜慵看鏡，清狂愛作詩。
唱酬真得侶，衰白亦相宜。

和方叔中秋

待月徘徊東澗濱一天風露淨無塵老人歡意年年減
佳節清光夜夜新悼往難傳雲外信舉杯那復眼中人
飄然遙想騎鯨興更覺高歌有鬼神

賦鞏丈鸚鵡三首

隴汧歸路渺漫漫且向金籠刷羽翰院靜日長頻送語
時時圖得主翁看

紫燕黃鸝亦言語或依簾幕或穿花較量愛重無如汝

合在華堂富貴家

翠衿紅紫嬌唇舌羽族於中最性靈巧護狸狌莫驚嚇
好留相伴誦心經

五日不出戶

五日不出戶門前楓葉丹清芬餘橘柚老色半林巒社
鷺知時去昏鴉取勢盤秋深多物色應接未能安

次韻仲志荷珠

觀彼雨中荷跳珠自涓滴初集尚端停稍多還倚側虛

明是本體不受世鑽刻初疑鮫人泣淚向盤中擲又疑
石筍街拋灑天不惜但見漾玻璃詎容登几格高低相
依映傾瀉才咫尺瀏漓丹砂汞晃蕩摩尼色照乘儻見
收價恐千金直日乾風勢定泯若無留迹固知造化巧
又似兒女劇

寄題時氏小飛來三首

依約峯巒似竺乾
崑崙峭岩洞老雲烟
有時風雨無人夜
疑有猿聲到枕邊

曠士無時不愛山却嫌庭戶少巔峴何年却火留遺斷
便作北高峯下看

須彌納芥不為誇曾向壺中貯九華靈隱寺前天竺後
好峯都落在君家

和鞏教授訪別二首

君來別我還歸去君去重來定幾時此後相思無可寄
相思欲寄莫如詩

酒醺情惡不成醺况復匆匆欲語分留客恨輪無四角

供庖歎鼈少雙羣

寄鞏大監

十里兼旬信不通
每看金阜想高風
已知憚暑難迎客
不敢將詩更惱公

謾興

烏藤黃葛一山癯
萬事從人笑濶迂
作計尚餘詩氣習
遣閒須著睡工夫

和鞏教授趨朝

昨夢中宵拾夜光
曉驚新句墮書旁
英游只合陪青瑣
偉論何須列皂囊
溪上林巒新紫翠
船頭橙橘半青黃
茲行好語須頻寄
只恐空踈窘報章

應令水墨素馨扇面二首

清似山梔馥似蘭
何人淡墨試毫端
若無密葉相遮映
全作江梅春曉看

玉質生從瘴海傍
輕綃淡墨寫微茫
疎花賸作江梅瘦
手底風頭只欠香

閏七夕呈譙內知舍人

佳期有盡情無盡一再相逢意若何
正使長年成會合臨分依舊黯情多

間興

數點青峯照夕暉一灣寒碧帶疎籬
興來倚杖閒臨眺巾影欹風似阿誰

偶題

露葉明朝彩雲峯吐夕嵐山中無限景
詩力不相參

臘中感春

小雨濕紅蕤輕颺動碧池東君送消息預作探春詩

屋角丹楓

金行肅物欲功成一夜江楓點翠屏不是天公愛紅葉
要驅小隱入丹青

辛亥夏余將廣舊廬偶讀樂城李方叔新宅詩
篇是時子由方治第有余年七十無住著屋成
可作十年客之句感而賦之

穎濱七十無住著我室初成四十七前賢蚤達尚如斯
我已多公五千日屋成作客可十年此老八十終斯言
我今追公尚一紀來日盈縮猶茫然製衣起屋俱犯戒
無屋無衣兩為大世間萬事且隨緣運海巢枝俱一快

辛亥春夜雪忽積竹松欹折過半

夜來雪積不可料晨起壓盡庭前花道松俯偻若揖客
江竹離披如倒戈沙頭寒重鴈不起門外日高人未過
此時薪米不易得晨突有烟能幾家

夏日奉天台祠祿

青衣揮箠卧藤牀翠袖携壺過酒漿
蝟腹出波烹茱實
裹蹄和露擘蓮房
相呼時入雞豚社
獨坐曾無鴈鷺行
便是赤城真隱吏
不須劉阮更相將

青奴

正堪休手足好事降為奴
具眼感君惠無心真我徒
耐寒曾得友蒙恥恐非夫
却羨木居士盤鳩賜策扶

秋園謾賦呈方叔

娟娟鮮飈動遠林
亭亭暮靄占遙岑
淵明松菊秋容澹
仲蔚蓬蒿露氣深
莫笑四携亭未具
且環十鼓坐同斟
更須少待桂花發
林下春容把臂吟

余以四携名亭而未具姑以瓦鼓坐

客

和答鞏提幹見賀浙東總戎

黜陟何嘗到耳邊
旋栽花木學平泉
二年竊食祠官冷
一日頒恩寶篆鮮
閩寄暫居油幕副
朋從遙憶竹林賢
詩筒從此長來往
應有人編唱和篇

送楊方叔還山二首

一語何嘗及世氛若非說劍即論文有時伴我松岡上
間看南山萬塢雲

可人自是難招喚此去相從定幾時來歲春風暖行色
隱侯樓上要題詩

和李崧卿九日

重陽無菊悶書空心似淵明興不同聊且携壺上東嶺
不妨欹帽對西風百年盡付無何外三逕誰如阿堵中

十月黃花方爛熳莫辭聯騎訪山翁

送棗陽軍使劉似之兼棗陽令

四方男子志當在壯年時民社非輕畀才猷且小施附
庸今列邑大國古稱隨莫謂朝廷遠行看召驛馳

又

去去檣烏遠何時到漢東官期應歲臘客路尚秋風大
楚風聲混三苗土壤通邊頭有新句莫惜寄飛鴻

之官婺州

一夕霜風掃翠微
宦情何似客情悲
留連祖帳臨分日
徙倚家園欲去時
三載奉祠心似水
一番挈累鬢成絲
高飛深泳慙魚鳥
臨水看雲有所思

送客

今日出郊送客明
朝肩輿入州六十年
前伎倆白頭也
合歸休

六十七守歲

少時守歲喜踴躍
老境衰頹只益眠
明日未應添白髮

怕人問處是增年

除草篇

有客勸除草草去眼中淨梵志反著襪一國皆通病
頰上著三毛精神乃殊勝微雲點太虛不礙天宇瑩芳草
有佳色難與俗士訂曾著騷人經屢勤才子詠因依仲
蔚門繚繞淵明逕不入膏粱觀唯契山林性吾家北窻
下曠土勿畦町花草隨意生紅綠同一盛晨露共明燭
夕烟相掩映既傍竹陰清又連苔色靜微薰入衣屨餘

潤侵筑磬終日坐其間心清神氣定詩酒頗相關世事
不足聽從渠笑吾癡此意未易竟

賦婺州察推廳悠然樓二首

着眼看山不見山徒勞終日對孱顏偶然境意相迎處
只在尋常俯仰間

為秫求官興頗深忽懷松菊便投簪先生萬事皆如此
何獨悠然見碧岑

游葉丞相園有感

卷三
費盡心靈用盡功林間臺榭巧玲瓏可憐花木無愁思
不見主人依舊紅

又

功成三徑欲歸休結束池亭處處幽花木成時春更好
如何不作百年留

楊方叔過訪送行

遙傳軒蓋度西岡亟返柴車喜欲狂不憚除堂十夫費
且謀解榻半窓涼歸途送目雲千疊別夜尋詩月一方

何日重來慰牢落梅山花發待傳觴

壬子歲送方叔

經年懷抱幾曾開面上康衢一寸埃已向西偏營小築
高懸一榻待公來

滿公臨老種松志可尚也梅山老人為說小偈
滿公種松何太癡急景尚作千年期安得雷風一夜拔
千尺與汝同看龍蛇舞月時

感事

昔人廳下纔旋馬，今代公卿甲第高大屋脩椽。當日事
拾遺故宅轉蕭騷。

晚步阡陌見水珠，迢迢上浴苗葉月華露彩相
映清發，倘非真在田間，孰知此趣？因賦

水珠捲苗葉，夕氣轉陰機。浩露添璀璨，明蟾坐發揮。靜
窺關物理，行拂上人衣。除却長沮伴，能知此意稀。

又

月壁上遙巖，水珠生晚苗。田家足清曠，野步自超搖。有

叟談耕鑿無人說市朝却憐膏火地車馬客塵囂

歸故園述懷呈唐伯憲

度柳依橋瞰淥波緩尋花徑上松坡莫嫌去國謀身拙
却是歸田得計多舉世眩名甘汨沒幾人聞健得婆娑
便須和取歸來曲收拾餘年老薜蘿

又

三徑元須近吾廬亦庶幾稍晴頻縱步遇雨不愁歸夕
暗兒篝火晨飢婦餉炊棧羊還可炙捩馬不須羈引路

犬先到慣人禽嬾飛有時携曠士把酒更論詩松露滴
行帳山風吹舞衣吾生身外足此樂里中稀歎息游嵩

館前賢意重違

園池貴近不貴遠溫公作獨樂園日宴
息其間及游嵩山又為游嵩別館每到

不過數日遠有暫來還
似客歸去不成家之句

晚晴

晚晴返照射高櫺不覺煩襟氣一蘇欲問明朝天色好
請看空際雨浮圖

梅山續藁卷三

欽定四庫全書

集部

梅山續藁卷

四至
六

詳校官庶吉士臣翁樹培

主事臣呂雲棟覆勘

總校官進士臣繆琪

校對官中書臣朱炘

謄錄監生臣孫鳳祥

謄錄監生臣李學瞻

欽定四庫全書

梅山續藁卷四

宋 姜特立 撰

山園四詠

雅志堂

謝公有雅志頗愛東山游坡仙得其心妙語寄清謳蒼
生事未了已了還即休彭澤小邑宰其事固不侔等閒
一墨組未死誰肯投況此大功業聲名天壤流始末終
不渝盛事古鮮儔信知山林樂不貴公與侯岩壑有廊

廟搢紳或戈矛而況此老軀日月不少留汲汲尚不足
豈容復悠悠揭榜慕前賢駑馬晞驂騮死者如可作把
酒起相酬

風露亭

萬物冒春暉紅紫競芳節唯此玉井蓮迥與衆品別雅
受冷風吹復愛露華潔亭亭立波上晚意頗愁絕疑是
姑射仙半夜集瑤闕清虛不染塵瀟洒更宜月我慙窮
陋質對此冰與雪安得謫仙人超遙俯清澈把酒一高

吟玉色相映發

烟壑

蒼然者為烟呀然者成壑賴此十八公與之相領略中

間製小亭面勢巧安著千山攢脩眉一水環青玉勃圖

北人謂浮圖為勃圖映高標觚棱翼飛角夜深或沈沈月澹還漠

漠趺坐者誰子草衣復芒屨素髮照晴昊飄蕭如野鶴

儻非違世者何以有此樂向夕下坡陀清興寄寥廓此

境真可畫此意終難貌

醒心亭

昔人醒心處唯恐玉山頽我今醒心亭正與醉為媒醒
心非醒酒所醒遺形骸如病得大丹如夢忽驚回如閤
秉巨燭如蟄發春雷有時酩酊中蘧蘧自形開下視名
利場昏曉走塵埃醒處元不醒醉時良可哀嗟哉我何
人顛倒有至懷不求醉中醒却醉醒中杯

寄里中諸友賞菊二首

問訊故園今若何不堪歸計尚蹉跎祇應庭下千叢菊

今歲雨勻花更多

夢寐家園百里間
秋來青藥想班班
但得諸公為臨賞
也如老子對南山

老去

老去光陰日日慳
更無大藥駐朱顏
近來學得長生訣
十二時中總放閒

佛桑花 一名朱槿

東方聞有扶桑木
南土今開朱槿花
想得分根自暘谷

至今猶帶日精華

送潘叔昌主教清湘

瀟湘山水清絕甲天下昔人謂騷人墨客如
屈原宋玉賈誼輩皆嘗至焉此天所以厚秀
傑之士理或然也

醞藉金閨客風流粉署郎文嘗追屈賈身合到瀟湘經
術東萊學才名上國光遐方豈淹泊雲路看騰驤

雙林益老養直之後入都見朝貴覓詩

正平有詩孫蘓氏代不乏來傳大士印去說宰官法霜
令方清高行色待明發蚤賦歸來篇莫負碧雲合

寄方叔游法輪寺三首

山中境最靜靜極恐關情莫聽流鶯語應懷求友聲
一別三四日已懷千萬情醒心亭下水先作夜吟聲
境靜約心兵無由起妄情擬將笙笛耳同聽夜泉聲

廢桑畦種花

課僕斲桑窠從頭盡種花莫教聶子見怪我不栽禾

種花真獲落曾不救號寒我自金芍藥從渠黑牡丹

脩竹為王俊卿國正賦所居也

入門見脩竹茲士已可人不必問寒溫便可飲清醇此
興諒不淺此意亦已真安得王子猷相與共卜鄰

閒詠三首

莫笑歸耕計未然我今得計是歸田天公若也憐衰晚
更乞門身二十年

銅山鼓鑄成何用金谷榮華畢竟空老子百年無長物

只留明月與清風

醒心亭下弄潺湲雅志堂前擁髻鬟
除却華山陳處士祇今誰似此翁閒

寄陸郎中

整整平頭七十春兩翁可是太陳陳
世間過眼無非故唯有詩情老更新

李仲永墨梅

寫竹如草書患俗不患清畫梅如相馬
以骨不以形墨

君曩有文夫子蟬腹蛇跗具生意當時一派屬蘓公雨
葉風枝畧相似花光道人執天機信手掃出孤山姿陳
玄幻却西子面此妙俗士那能知近時賞愛楊補之補
之嫵媚不足奇李生於梅却有得高處自與前人敵倒
暈踈花出古心暝雲暗谷藏春色我一見之三歎息意
足不暇形摸索君若欲求之點畫胡不去看江頭千樹
白

和趙太中覓詩

每嘆學詩如學仙未能換骨謾成篇翰林萬丈光常在
著作三都賦蚤傳詩賦嘗魁宗子半世無成負便腹終年有味
聳吟肩明珠何事輕彈雀多謝高情未棄捐

說詩

作者固已難讀者亦未易有寶斯識寶至寶况難值三
家窶人子豈辨瑚璉器鼠璞將見珍周鼎或幹棄詩道
誠難言大要該六義其高出蒼天其深潛厚地枯中發
穠華淡處有餘味似拙乃藏巧借鈍以宣利開濶要波

濶組織須經緯或險而莫親或平而足貴圓轉各隨形
悟入非力至不止事吟哦先須存興寄變態千萬端勝
處同一致以此而讀詩庶得古人意

寄恪

忽得平安信新知進學功慮深心更苦趣靜句仍工所
貴身無玷何憂祿未豐望雲休作念正要爾移忠

歸故園二首

坐叨厚廩傍吾家此去吾家百里賒聖主恩深難報處

四時得看故園花

一去丹墀六換春已將柴柵等簪紳雖無名節高當世
也是羊裘一故人

退語

滌瀕堆邊百丈絕宋都六鷁風逆折曹公燒船烟燄徹
苻秦百萬走流血未若姜子之退最勇決

送邦直弟歸鄉

有弟自吾里相從兩月餘老來歸日少別去見時踈魚

隊猶前日鵲原尚故居不知風雨夕相憶更何如

同官游赤松二首

今朝乘興出林垞商略天公未肯晴日色忽收梅氣潤
山光便挾麥風清

山輿翠蓋出華顛白氎衣衫阜作緣我輩自應三洞主
傍人喚作五通仙

是日適有五
人或以為戲

呈方叔

聲牙落魄一閒官職事何嘗見一斑不是論松須說劍

若非尋壑即觀山間看落葉隨風去冷笑奔雲送雨還
更有劉巖楊處士伴渠癡坐老花間

歸故園二首

向來叨趣內朝班宮漏雞聲曉夢間今日身閒無一事
五年睡債一時還

桃李歸來已半空不堪春事去匆匆落紅猶自留連客
故向尊前舞晚風

送雙林益老

老鶴精神不受羈今朝何事又孤飛不依大士雙林住
却向東峯小隱歸野色草堂開泱泱晨光日觀接熹微
此時四脚棋盤上坐斷人間第一機

迓木簷事

出郭轉蕭瑟寒溪生素波茅簷迎日暖楓岫占秋多從
宦嗟吾嬾流年奈爾何念歸應不遠新菊已緣坡

局岫為張支使作二首

士衡招隱翠幄長統卜居露幃未若君家局岫千峯盡

鎖雙扉

老去林泉屬我時
來軒冕輸君正好南
冥運翼未用北山移
文

次韻陸郎中

亟報門前寄好音
炯然書札照家林
興來自說宦情薄
詩到方知秋思深

時寄秋思詩

臨老讀書因教子
閉門捫蝨

為搜吟當今大筆如君少
未用深藏嘆陸沈

重題八詠樓

每到樓中憶沈郎碑間文字爛生光四時山色藏烟雨
兩派波光下夕陽湛輩僅能登峴首召南元自愛甘棠
英游已遠空追想附驥猶堪託短章

戲呈趙舜臣覓酒二首

畢君甕下幾成縛屈子江邊又獨醒賴有東陽賢府主
不嫌馳騎送寒廳

兵厨釀乏吻生烟阮校如今作贅負却怪淵明便歸去
酒材猶自有圭田

感夢

前後升沈二十年向來孤冷偶同然
夢中許我傳衣鉢
敢望功名却比肩

游赤松小桃源

仙山千疊擁雲屏
行到桃源境更清
坐久令人思謝傅
欠渠低唱兩三聲

和唐戶古律三首

世事每多違苦心終眷眷
功名等搏沙歲月如奔電
古

人竟何許厚祿良難戀冥鴻已高翔歸翼方知倦

我來雙溪上正值黃花秋方為逆旅計未辦佳賓留絕
憐北鄰阮不厭東家丘詩盟今幾人肯著老子不

雋譽早知畏佳篇今見蒙幺響去寂寂正聲日隆隆愛
君甘苦外與我嗜好同不妨時袖句共作聖賢中

歲暮月下懷

春事侵紅藥年光入白髭暖雲籠月夜斜照放燈時羈
宦元無味清愁只有詩故山無百里夢寐數歸期

和唐伯憲二首

倦翼投深樾驚鱗憶故川
淵明松有逕揚惲豆宜田
窮達安徽分行藏媿昔賢
此心誰盡了達此固怡然

卜鄰初識面把臂便論詩
摸索曹劉耦憑陵漢魏時
新章專雅潔古隸更清奇
若比江西派無人說具茨

唐伯憲赴括蒼戶掾

吾州刺史宅上冠靈鰲顛
千嶂翠合沓一水清潺湲
北指烟雨近西睇鶯花連

烟雨鶯花
亭館名

積李雪縞夜崇桃霞

覆川羣材聚仙境上幕開中天宜有唐景革參與鄒枚
聯戶掾吾故人學問自家傳隸法既奇古詩句仍清圓
想當吟哦時攬勝筆如椽坐使冰雪腸沉浸含芳鮮試
諗吾邦人世豈有此賢勿歎官尚卑行矣當騰騫

梅山續藁卷四

欽定四庫全書

梅山續藁卷五

宋 姜特立 撰

再賦醒心亭

小橋枕滄灣一水繞清激橫來莫知源委去無尋迹戲
魚時度淺好鳥忽鳴寂堂坳隱空磴竹樹闕寒碧朝霏
溼朱栢倒影汎瑤席仰窺一逕上始覺藏深僻尚憶客
中行盤嶠倦登陟峯回路忽下溪館曾休息高低相掩
映景趣無終極竭來坐忘疲欲去或窮夕安得青霞人

共此白雲適

送方叔二首

我走塵埃君入山
須知靜躁不相關
何時賓主俱無事
雅志堂前一解顏

海鷺天外絕虞羅
偶爾來游澗谷阿
世上稻粱留不得
翩然還戀玉山禾

次韵巖桂

濃香透徹泥丸頂
更惱詩腸卒未休
安得此花長不老

盡回四序作清秋

和荆公二首

老去生涯華子岡年來得失一繩床是非堯桀何須較
身世於今更兩忘

子房不願蕭曹位底事穰侯畏客來得一老兵皆可飲
何須車馬便驚猜

閒詠

坐叨厚廩飲醇醪不挾文書不坐曹檢校園花為日課

東尋詩草計年勞仍將書冊供慵臥時喚杯盤佐老饕
感激大恩何以報唯祈聖壽等天高

吳煥章送行

素行躬韋布長材輾摺紳老成吾甚畏競爽爾誰鄰半
刺人稱屈金牛技未伸難兄曾託契薄宦偶同寅和韻
長愁險開樽屢飲醇高談烘白晝妙舞艷青春方韋交
情密還欣道義親到家才旦暮回首遽參辰越榜驚行
速吳牋荷寄頻施松從此始折柳竟無因指日騰夷路

茲時記故人聊憑五字句千里話慇懃

和鞏宰送牡丹三首

香泥筠籠遠擎來曾向河陽縣裏開堪笑杜陵何短拙
却憑蕭八覓桃栽

唐世花名寢顯時才如韓白尚無詩本朝盛賞唯西雒
萬幄千庖泣玉脂

品格高低各自春大如玉斗滿如輪前賢曾譜花王說
唯有姚黃始是真

田文

田文養士天下無撞鍾列鼎傾金珠入關幾作秦囚拘
當時貴客如櫟株倉皇脫死託小夫嗟哉所養非所需
劉致政壽藏歸庵

我愛青溪山峰巒秀如刻作庵賢主人只恐歸未得且
住三千秋游戲人間客遺蛻何足論西乾有真宅

應致遠謁放翁

雙溪雪消水生波有客袖句來相過自言平生有詩癖

擺落世故工吟哦不願垂腰連六印不願爰田封萬戶
唯於前輩識蘇黃却向古人窺李杜嗚呼斷絃誰續髓
風雅道喪騷人死三山先生真若人獨將詩壇辟孤壘
此翁筆力回萬牛淡處有味枯中膏有時奇險不可迫
劍門石角錢塘濤源流不嗣江西祖自有正宗傳法乳
請君去直箭鋒機歸來聽我禾山鼓

野步

江山客思滿雲水稻田空日塢懸秋實霜林墜晚紅

王方叔喪耦

人生大患身為累火宅啼號更累身聞道中郎唯有女
不妨半世作閒人

余壯歲嘗假居塔山寺後三十年重到賦二絕
故山重到思依依不見霜眉雪頂師三十年間真一夢
夜檠猶記讀書時

一墮紅塵六載餘黃金不染白髭鬚向來猿鶴應相問
瑤合犀餅無恙無

兩生

齊魯云何兩大臣
初無名字掛朝紳
若將出處評高致
更是夔龍以上人

感懷效淵明體

人生百年中長為子孫憂
人生百年後死生兩悠悠
流傳至曾玄恩愛竟何許
孤墳千萬禩莫適誰為主
嗟哉世間人小黠而大癡
惜衣仍忍寒省口仍忍飢
一朝大化盡未免世俗嗤
存者且偷生逝者歸無期
眼前一樽

酒勸君且重持

客至

凍雲垂地寒崢嶸故人訪我邀晨烹旋燒姜子金絲酒

却試蘇公玉糝羹

俗以雞子和酒燒之謂之金絲酒以山藥和者為銀絲

出處

士貴重其身出處各有道一為已私蔽喪却千金寶我
非真勇者歸意良草草遠路方多岐幾人能辨早

送盧潛

國華郎中與余同門同里又同甲子忽聞釋
省戶清班以七閩節歸過故鄉小詩送行併
寄老懷

昔忝二三子今俱七十翁西州十年別南部一尊同我
已三徑具君還雙鬢蓬便須輕世事留眼送飛鴻

偶成

蜨因變化多膠網魚為飛升却曝鱗唯有冥鴻無羨慕
世間矰弋莫相親

古風送鄭路鈐

故人訪我雙溪邊袖中明月五符連一笑傾倒秋風前
復憶鷺序同聯翩君今半老我皤然功名富貴空中烟
南柯蟻穴醯雞天鶴長鳬短誰虧全我今日月箭脫弦
夜行不止真可憐不如歸釣清泠淵日高未起醉即眠
心和氣定養壽年世間萬事姑隨緣交情儻或未棄捐
不妨時寄相思篇

公館

公館當清夜移樽近北墉秋聲連蟋蟀月色淡芙蓉

次楊元會白蓮二首

月為精彩雪為膚翠蓋迎風漾綠珠我欲褰裳賒一顧
能回玉面向人無

不御鉉華似洛妃清虛全與道相宜月明何處回仙駕
獨立沙頭爾許時

郡中朔旦朝拜聖祖

巍像儼明庭衣冠盡夙興曙光搖斗極雲氣掣觚稜嘗

記朝天日君王玉座升璇霄烏萬點飛舞最高層

上每冬御

殿有烏數千百自西興來噪舞其上久之趨鳳山而去時謂之趨朝烏

方叔元振元老同令姪舍人見訪

聯翩三鳳接華裯小阮驅車復後塵
嵇呂相思千古事後來命駕更無人

九日寄楊方叔

安穩楊夫子秋來闕寄音
遙憐好兄弟相伴老山林
菊是故園色人無舊賞心
雲萍兩漂泊西望一長吟

右寄此詩後忽得簡云兒曹亦寄五言用韵皆
同殆一段佳話遂再賦長句

天性固自同學問亦有源胡為兩章句韵韵皆蟬聯有
如五音作琴瑟隨宮懸排比不亂行又似貫珠然竊意
予父子與公有世緣精神所交感默契難言詮書來亟
報我故事前無傳欲將此段奇竟入佳話編况復惠新
句律呂遞相宣

子陵

不為故人屈清名日月高當時若相漢不過比元侯元
侯功易歇子陵名不滅所以想孤風猶如隔前日

欲雪

嘯侶飢鳶愁古木啁羣凍雀聚踈籬一庭寒意沉沉靜
正是江天欲雪時

冬至

老來心緒怯年光又見春來報一陽未必暗添宮線永

只應先引去聲鬢絲長

鵬鷗問答

吾聞北冥鵬翼若垂天雲矯首扶桑汜投趾崑崙垠渴
飲黃河流飢食紫淵鱗長翮盈千車短羽重萬鈞去以
六月息棲止良苦辛黑風忽翻海未易容其身偶與斥
鷃遇問鷃有何樂鷃云我么禽豈暇議寥廓為生誠甚
微為計亦易足吸以棘針露分以鷦鷯粟決起槍榆間
却向蓬蒿落不睨九萬程只願一枝託鵬聽鷃所云似
若生羨慕彼小乃有餘我大適為苦呼鷃問所安鷃笑

而不語

送墨魚輩大監

底事呼為海裏羊
陀尼為背錦為裳
慙慙送似曲湖老
要薦君家玳瑁觴

脩謁

偶爾事脩謁
籃輿經近村
田夫不避客
袖手立衡門

野薔薇

擬花無品格
在野有光輝
香薄當初夏
陰濃蔽夕暉
籬

根堆素錦樹杪掛明璣萬物生天地時來無細微

寄方叔黃草道服

非蕉非苧復非絺不是山人木葉衣寄與詩翁莫嫌陋
看山長袖白雲歸

北檻

北檻近中堂緣堦物自芳晨清花拱露地僻蘚侵廊坐
久時開卷吟餘或炷香終朝無客至一枕到羲皇

負暄

不是羲和德澤流寒鄉何處覓溫柔絕憐天上黃綿襖
大勝人間紫綺裘旋挾胡麻隨景轉更携書卷與閒謀
天和妙處誰能會欲獻君王却自羞

小孫納婦

慶事集朋親孫枝喜氣新歌雲停碧落舞雪眩青春暖
日花君子清樽酒聖人一春行樂地不負牡丹辰

同方叔自郡城歸故園

吏隱豈無名東南一客星松關今有主岫幌不須扃無

夢妨清睡唯間伴獨醒着鞭吾已晚先媿一鴻冥

和

李 薦

風流蚤得名兩鬢任星星花徑春長掃林扉夜不扃精
神老益壯風月醉還醒妙句難酬和窮搜入杳冥

癸卯冬解官三山歸雙溪自南而北路傍梅花
經月不絕久欲作數語未就乙巳仲春書於鳳
山僧舍

路出南州向北來吳山梅冷粵山開陽和次第隨程到

一月吹香管客回

煩劉公達梵園中小池以詩謝之

感君巧思葺芳塘石甃無痕細著行更擬中間添小嶼
藕花深處著鴛鴦

辛亥上塚

寒閨守節少年時志凜冰霜不可移追遠積成千古恨
報恩寬作十年期此生不愧先君死後世應傳寡婦碑
蘭若棲神安穩在遺言今日九原知

遺言欲葬
寺依佛香火

詩送譙知閣

一去丹墀六換春，追尋舊事恍如新。
屢煩携酒來青邸，相伴同班上紫宸。
自分此生成死別，豈知今日更情親。
飛騰已向風雲會，得意應須記故人。

余卜居偶得山水之勝喜而賦之

寒士把茆聊蓋頭，豈假山水尋清幽。
偶然駐足得勝地，造物所賦非人謀。
有山無水清暉減，有水無山爽致卑。
流水青山屋上下，此妙唯許坡公知。

梅山續蒙卷五